



Kabarett „Sachsenmeyer & Co.“
09224 Chemnitz
Feenweg 11

Hauptspielstätte:
Kabarett-Kiste (im Hedwigshof)
An der Markthalle 8
09111 Chemnitz

Bestell-Telefon: 0371 - 694 77 11
www.sachsenmeyer-kabarett.de
e-Mail: sachsenmeyer@t-online.de

24. Kalenderwoche – ab 12. Juni 2011

Was isn eischendlich mid E 10?

Lähbd E 10 noch? Odor hammse die ganze Briehe ins Mär gekibbd?

Mei Audo dud ja mid Diesl fahrn. Isch hab das Dheador mid E 10 bloß so am Rande midgegrischd. Abor nu is mir dursch Zufall eingefalln, dass isch gahr nisch weeß, was eischendlich bassierd is, nachdähm de Gadaschdrofe schon lischdorloh gedrohd had. Das Ende dor biologischn Bennziehnähra! Abor dann kam de Gemiesebesd hoch! EHEC!

Also, wensde nach de Zeidung gehn dusd, is mid E 10 jedzde alles in scheensdor Ordnung. Als wie wens nie e Broblehm gegähm hädde! Bloß noch EHEC!

Un daderbei hasde ja schon Angsd gehabbd, dor ganze Bennziehn margd in Deudschland dud zusambreschn. De Dankschdelln gehn massnweise Bleide un so. De Leide lassn lieber ihre Audos schdehn un loofn mid de eischenen Beene odor dun Radfahrn, als wie dass das misderiöhse E 10-Gelumbe dankn dun! So hasde ja schon gedachd!

So hab isch jednfalls schon gedachd un mir große Sorschn gemachd. Un nu isses weg - das E 10! Weg, aus dor Zeidung! Ooch das Färnsähn schweischd beharrlich. Bloß an dor Dankschdelle, da duds E 10 gähm, als wie wens das Zeisch schon immor un ewisch gegähm ham dädde.

Es had ooch keene Selbdsdordanschläsche off Dankschdelln un ausgewählde Säuln gegähm! Nee, ooch dor Umweldminisdor is nisch zurigggedrähdn. De Raffinorien raffn wasse kenn! Alles leefd wie eh un je! Ooch das Schbiel mid de Breise!

Wobei, da had ja nu das Bundeskardellamnd was rausgeforscht... ja, mid eenor ganz großen wissnschafdlischn Unnorsuchung, die beschdimmd nisch billisch gewähsn is, da ham die rausgeforscht, was mir alle schon immor gewussd ham - nähmlisch, dass sich de Bennziehnhärschdellor sähr geschiggd de Daschn filln dun, wenn eene vorschdärkde Nachfrage zu vormudn is. Dass die alle gleichzeidsich immor kurz vor Osdorn odor vorm Wochnende de Breise e Schdiggl nach ohm schiem dun... - das is ja nu schon... also, bei uns im Osdn isses seid dor Wende so! Driehm isses seid noch viel längor so. Das had schon dazumals mei Onkl erzähld, wennor an irschendwelsche Feiordaache bei uns im Osdn zu Besuch gewähsn is. De Bennziehnmaffija had widdor de Breise hochgeschraubd! - haddor immor gesachd.

Abor da had das Kardellamnd doch eene annre Ansischd als wie mei Onkl dazumals. Das is keene Maffija, sachd das Kardellamnd. Es gibd keene Breisabschdimmung! Es is kee abgekardedes Schbiel! Es is das Schbiel, das alle von alleene schbieln dun. Jedor fiehr sich un unnor schdrengror Beobachdung vom annorn. Es is wie beim Bogorn. Da muss mor sisch nisch abschdimm, de Reeschln kennd jedor. Un reihum muss jedor ma ausschbieln un zeischn wassor had. Die annorn dun midgehn odor dun ausschdeischn... oder...! Dor Unnorschied is bloß, beim rischdischn Bogorn dud eenor von de Midschbielor vorliern. Beim Bennziehnbogor dun de Zuguggor vorliern. De Schbielor gewinn alle! Ob nun mid E 10 odor ohne!

Eduard Sachsenmeyer